

118
28. júní

SAMÞYKKT

fyrir Veiðifélag Norðurár í Borgarfirði.

1. gr.

Félagið heitir Veiðifélag Norðurár í Borgarfirði. Heimili þess og varnarþing er að Dalsmynni, Norðurárdal, Mýrasýslu.

2. gr.

Félagið er stofnað í því augnamiði, að gera sem arðbærasta laxveiði og silungsveiði í Norðurá. Tilgangi sínum hyggst félagið að ná með því, að selja ána á leigu til stangaveiði, en koma í veg fyrir allar aðrar aðferðir við veiði í henni nema að svo miklu leyti, sem nauðsyn þykir að nota netaveiði til þess að ná í klaklax.

3. gr.

Félagssvæði er Norðurá frá Króksfossi að Munaðarnesi og Arnarholti.

4. gr.

Félagsmenn eru allir ábúendur jarða eða eigendur veiðiréttinda í Norðurá á félagssvæðinu, þ. e. fyrir þessum jörðum: Krókur, Háreksstaðir, Sveinatunga, Hvammur, Hóll, Hafþórsstaðir, Dýrastaðir, Hreimsstaðir, Klettstía, Dalsmynni, Skarðshamrar, Desey, Brekka, Hreðavatn, Svartagil, Glitstaðir, Uppsálar, Laxfoss, Veiðilækur, Einifell, Litla Skarð, Grafarkot, Stóra Gröf.

5. gr.

Veiði öll skal óheimil í ánni, nema með sérstöku skriflegu leyfi félagsstjórnarinnar. Skal fram tekið í veiðileyfi, að eigi sé heimilt að nota önnur veiðitæki en stöng, og að öðru leyti til hve langs tíma leyfið sé veitt og á hverju svæði árinna það heimili að veiða.

6. gr.

Félagsstjórnin hefur heimild til að leigja einstökum mönnum eða félögum alla ána eða hluta af henni, um tiltekið árabíl, þó aldrei fyrir lengri tíma í einu en 10 ár. Í slíkum samningi skal jafnan fram tekið, með hve mörgum stöngum megi veiða samtímis á hinu leigða veiðisvæði, og önnur skilyrði fyrir veiðinni.

7. gr.

Stjórn félagsins skipa 3 menn, formaður og tveir meðstjórnendur. Stjórnin skiptir sjálf með sér verkum. Stjórnin skal kosin á aðalfundi til þriggja ára í senn. Stofnfundur félagsins kýs hina fyrstu stjórnendur, en þeir ganga úr stjórninni eftir hlutkesti, einn á hverju ári og verður því eftirleidis kosinn einn maður í stjórnina árlega, til þriggja ára. Enginn atkvæðisbær félagsmaður getur skorast undan kosningu, nema lögleg forföll hamli eða hann hafi verið í stjórn samfleytt í 3 ár.

8. gr.

Stjórnin hefur á hendi umsjón með öllum framkvæmdum félagsins milli aðalfunda. Hún hefur og eftirlit með því, að samþykktum félagsins sé hlýtt og má ráða mann sér til aðstoðar til þess að hafa eftirlit með veiðinni o. fl. Formaður félagsstjórnarinnar kemur fram fyrir félagsins hönd út á við og hefur yfirumsjón með störfum þess og öllum fjárreiðum. Á fundum stjórnarinnar ræður afl

atkvæða. Ef atkvæðin eru jöfn, sker atkvæði formanns úr, enda er stjórnarfundur lögmætur er tveir stjórnendur eru mættir.

118
28. júní

9. gr.

Aðalfundur félagsins skal haldinn eigi síðar en í febrúarmánuði ár hvert. Aðalfundur er lögmætur, ef hann er skriflega eða símleiðis boðaður með minnst þriggja daga fyrirvara og sé fundarins og efnis hans getið í fundarboðinu.

Á aðalfundi skýrir stjórnin frá störfum félagsins á liðnu starfsári, leggur fram áætlun og tillögur um starfsemi þess á næsta ári.

Þar leggur hún fram endurskoðaða reikninga félagsins og úrskurðar fundurinn um þá. Auk stjórnar kýs og aðalfundur tvo endurskoðendur félagsreikninganna. Hann kveður og á um laun stjórnar og annarra starfsmanna félagsins. Afl atkvæða ræður úrslitum mála á fundum, nema um breytingar á samþykktum sé að ræða eða félagsslit.

10. gr.

Aukafund heldur stjórnin þegar henni þykir ástæða til, eða ef $\frac{1}{4}$ félagsmanna æskir þess, og tilgreinir fundarefni.

11. gr.

Reikningsár félagsins er almanaksárið. Skulu reikningar fullgerðir fyrir aðalfund og lagðir fram til úrskurðar.

12. gr.

Arði af sameiginlegri veiði skal skipt niður á félagsmenn samkvæmt arðskrá, sem lögmætur fundur hefur samþykkt og undirrituð er að minnsta kosti af $\frac{2}{3}$ félagsmanna. Gildir hún í þrjú ár í senn. Náist ekki samkomulag um nýja arðskrá að þeim tíma liðnum, gildir hin gamla áfram, enda sé eigi krafizt mats að lögum. Félagsmenn greiða gjöld félagsins í sömu hlutföllum og þeir taka arð.

Tekjum félagsins skal skipt eins fljótt og unnt er, þá er þær hafa borgazt inn.

13. gr.

Brot á samþykkt þessari varða sektum frá 100—500 kr., og veiði eða andvirði hennar, svo og veiðitæki, skulu gerð upptæk og verða eign félagssjóðs.

14. gr.

Samþykkt þessari verður ekki breytt nema $\frac{2}{3}$ mættra félagsmanna á aðalfundi samþykki breytinguna.

15. gr.

Félaginu má slíta ef $\frac{2}{3}$ félagsmanna samþykkja það. Eignum félagsins eða skuldum, sem þá kunna að verða, skal jafnað niður samkvæmt arðskrá.

Samþykkt þessi staðfestist hér með samkvæmt lögum nr. 112 9. október 1941, um lax- og silungsveiði, til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 28. júní 1945.

Pétur Magnússon.

Páll Pálmason.